

# In chalender elegant ed infurmativ

L'Atlante De Agostini arriva dal Piemunt

DA GUIU SOBIELA-CAANITZ

■ **Mintga december survegn ins pliras occasiuns da «far chalenders», sco ch'ins di per rumantsch, pia da ruminar davart il temp che passsa e na turna mai pli. Il chalender da paraid dat occasiun da midar mintga mais il maletg che penda vi da la gutta.** Er il «Chalender ladin» (1) penda adüna vi da sia gutta, be spettond ch'in maun al piglia per sfegliar sias contribuziuns, per exempel quella davart Gian Battista Fritschun (1727–1800). Il «Calender romontsch 2015» n'è anc betg arrivà en Engiadina Bassa. Quel da las valladas talianas, l'«Almanacco del Grigioni Italiano» (2), sa distingua cun las fotografias originalas, saja quai da las baselgias o da la veglia viafier da Mesauc.

Ma quel ch'amis da la geopolitica spetgan adina cun mirveglias è il «Calendario Atlante De Agostini» (3): In volum

16 x 8 cm, cun liadira cotschnenta, 1200 pp. e 44 chartas da colurs. Lez cudaschin deditgescha in chapitel a mintga pajais cun t. a. las divisiuns administrativas. È quai vairamain anc in chalender? Geabain, e quai betg mo cun ils chalenders e las festas catolicas da 2015 e da l'onn bastes 2016, mabain era cun detagls davart il chalender giulian, ils islamics, il giudaic, il chinais e perfin il copt – quest per amur dals cristians en Eritrea ed Etiopia, anteriuras colonias talianas. Tgi che vul ir en Italia sto far endament ses «giorni festivi» (p. 27): Bavania (6 da schaner), «Anniversario della Liberazione d'Italia» (25 d'avrigl 1945), «Festa del Lavoro» (il prim da matg), «Fondazione della Repubblica» (2 da matg 1946), Nossadunna d'avust (ils 15), Numnasontga (il prim da november) e Nossadunna immaculata (8 da december).

I s'enclegia che l'editorial dal «Calendario Atlante» (p. 3) resguarda l'ac-

tualitad: «L'istorgia mundiala recenta sa distingua cun acceleraziuns imprevisas: Uschia il 1989 cun la ruina dal bloc communist, lur il 2001 cun ils schabetgs profetics dals 11 da settember, finalmain il 2008 cun l'entschatta da la crisa finanziaria ed economica globala. Er ils fatgs da 2014 èn stads fitg impurtants, cun las guerras civilas en Siria e Libia, ils conflicts etnics en la Republica centrafricana ed il Sudan dal sid, ils vents da guerra freida chaschunads dal separatissem en Ucraina, l'avanzada dal nov 'stadi islamic' en l'Irac e la Siria dal nord.» Il stadi il pli vast dal mund (passa 17 milliuns km quadrat) è la Russia; il chapitel relativ entschaiva cun in paragraf che di: «Il pajais è intervegnì directamain en la crisa ucranaisa per sustegnair la minoritad russofona. Da chalonda mars 2014 ha il parlament russ approvà il giavisch da president Putin da duvrar la forza per defender ils

interess russ en Crim, provinza [ucrainaisa] cun maioritad russofona. Ils 16 da mars ha in referendum autoproclamà palesà ina ferma maioritad favuraivla ad ina separaziun da l'Ucraina ed a sia annexiun a la Russia, ratifitgada ils 18 da mars da president Putin (...). Lez ha lura sustegnì milizas rebellas furmadas en l'Ucraina da l'ost» (p. 939, chavazzin «Russia»). Il stadi il pli pitschen dal mund è il Vatican (0,44 km quadrat); il «Calendario» menziuna «la Guardia svizra, corp militar fundà il 1506 e furmà da mercenaris svizzers da confessiun catolica» (p. 1129).

1. **Il Chalender ladin. Cudesch per la famiglia rumantscha. Annada 2015. Chesin Manella (081 833 18 12; [www.udg.ch](http://www.udg.ch)).**
2. **Pro Grigioni Italiano, Martinsplatz 8, 7000 Cuira.**
3. **Paola Fornara (ed.), Calendario Atlante De Agostini 2015. De Agostini Libri S.p.A., Novara (Piemunt) 2014.**